

LA PESCA NEL RÍU EO AL SO PASU PELOS CONCEYOS ASTURIANOS DE SAN TISO D'ABRES Y A VEIGA. UNOS APUNTES HISTÓRICO-ETNOGRÁFICOS*

Xuan F. Bas Costales

ENTAMU

L'Eo ye'l más occidental de tolos ríos d'Asturies. La so madre, sicasí, asítiase en Galicia, nel llugar de Fonteó, dende onde cuerre en direición norte hasta facer la llende natural ente les dos comunidaes llueu d'amestar al regueru O Cairo al so calce. Anda depués tierres asturianas en direición noreste y tres recibir pela izquierda'l regueru Trabada vuelve a marcar la raya ente dambes comunidaes. Más alantre recueye al Ouria y depués al ríu Suarón na villa d'A Veiga, onde desemboca na mar, formándose entós la ría que s'esparde ente los términos municipales de Ribadeo a manzorga y Castropol a mandrecha. Tol trazáu fluvial tien un llargor d'unos ochenta kilómetros aproximao, de los que namái una parte cuerre per Asturies, concretamente pelos conceyos de *San Tiso d'Abres* y *A Veiga*, formando la mayoría de los trechos del ríu frontera con Galicia.

Nes agües del ríu Eo y los demás ríos asturianos miedren un curtiu númberu d'especies que vien pescando y aprovechando la xente ribereño dende les alloñaes dómines prehistóriques. Nel antiguu réxime son munches les referencies a la bayura pesquera

* Esti artículu, que ye una reellaboración de los conteníos ufiertaos en Bas Costales (2007), inxerse nel proyeutu d'investigación *La pesca fluvial n'Asturies. Evolución histórica y artes*, financiáu pola Caxa Rural d'Asturies.

de les agües continentales asturianas per parte de cronistes como'l padre Luis Alfonso de Carvallo, que nel sieglu xvii conseña na so obra *Antigüedades y cosas memorables del Principado de Asturias* que «la pesca en los ríos de Asturias es varia, copiosa y regalada». Les especies fluviales más importantes foron históricamente los salmones, les truches comunes, los reos, les llamprees y les anguiles, tal y como apuntaba a medios del sieglu xviii el doctor Gaspar Casal na so *Historia natural y médica del Principado de Asturias*, puesto que «tienen grande abundancia de truchas y anguilas todos los ríos grandes y pequeños de este Principado de Asturias; y cuando llegan a las cercanías del mar, muchas lampreas, salmones y reos». Anque, de xuru, la especie fluvial más importante, tanto pol so tamañu como pola so cotización y apreciu, foi siempre el *salmón*, del que l'inxenieru Hilario Nava y Caveda dicía a finales del sieglu xix que «ha sido siempre muy estimado y ha tenido gran valor por la finura y consistencia de su carne, por su delicado gusto, por el gran volumen que en poco tiempo adquiere sin exigir gastos ni cuidados y lo bien que se presta para las conservas, cualquiera que sea el sistema que se adopte».¹ De fechu, y por cuenta la so importancia, la pesca de ríu n'Asturies regulóse históricamente al rodiu d'esti pexe.

La bayura de salmones ye precisamente la que-y daba al ríu Eo la so mayor nombradía, razón pela que s'asitió nes sos agües el primer cotu asturianu de pesca deportiva a principios del sieglu xx. Nesti sen, Pablo Larios y Sánchez de Piña, marqués de Marzales, gran aficionáu a la pesca que conocía a la perfeición el ríu, caltenía que

Dado su caudal, su recorrido y sus elementos naturales, acaso no haya otro en Asturias, ni en España, que reúna mejores condiciones para convertirse en un modelo de río salmonero. Cuenta con un

¹ Carballo (1695:10). Casal (1988:2). Nava y Caveda (1878: 295).

número extraordinario de pozos y desovaderos naturales, que sólo en el trozo de treinta kilómetros comprendido entre Abres, límite de las aguas salobres, y Villaodrid, alcanzan el aproximado número de cincuenta. Los pozos de San Tirso, Volta y Piago Mayor pueden considerarse como verdaderos modelos.²

La pesca nel Eo y los demás ríos asturianos entamó a regularse na dómina medieval cuando s'aprobaron los primeros midíes llegalés na península hispánica pa la so proteición. Sicasí, foi l'apropiación per parte de la nobleza y el cleru de los derechos de pesca lo que finxó la xestión d'esta actividá n'Asturies hasta lo cabero del antiguu réxime. Tres el desanicu de los privilexos señoriales a principios del sieglu XIX la pesca quedó pal llibre usu de los pueblos y los sos vecinos nun duldaron n'esplotala de forma masiva con tou tipu d'artes que provocaron l'amenorgamientu de los recursos fluviales. A lo llargo del sieglu XX, pela cueta, la pesca n'agües interiores foi perdiendo la so condición d'actividá económica y recursu de subsistencia pa les poblaciones ribereñes, al empar que diba volviéndose una actividá recreativa, deportiva y de fuegu, ensin ánimu de llucru na que tol mundu podía participar.

LOS PRIVILEXOS DE PESCA NEL RÍU EO

Na dómina medieval la importancia económica de la pesca de ríu nun cayó embaxo a los grandes propietarios del país. D'esta miente, bien por concesión real bien por apropiación illexítima, la nobleza y el cleru llograron facese col derechu de la so explotación esclusiva. Los privilexos sobre la pesca, ente los que destacaben les *regalíes salmoneres*, yeren una propiedá más de los señores, que

² Larios y Sánchez de Piña (1945: 205).

se mandaben pa los herederos o se cedíen empara de tou tipu de contraprestaciones. Col pasu del tiempu, yá na dómina moderna, reforzáronse los privilexos señoriales sobro la pesca, anque ello nun quitó pa qu'aumentaren los enfrentamientos colos ribereños y hasta que se dieren otros ente los propios señores. Sicasí, a pesar del control qu'estos caberos exercíen y de los permisos qu'a veces concedíen, los paisanos pescaben davezu al furtivu nel ríu.

Nel ríu Eo los derechos d'esplotación de la pesca del salmón taben en manes d'unes poques families nobles y el cleru, mentanto que la pesca del restu de les especies piscícolas yera por un regular llibre. Tanto los monesterios de Santa María de Meira y de Santa María de Vilanova, les dos instituciones eclesiástiques más importantes de la zona, como los señores d'O Pacio de San Tiso d'Abres teníen permunchos privilexos a lo llargo del cursu fluvial, sobre too nos trechos altos y medios del ríu. La nobleza y el cleru podíen xestionar direutamente los recursos pesqueros, pero polo xeneral facíenlo per aciu d'arriendos de los pozos salmoneros a particulares. Nesti sen, por poner un casu, el monesteriu de Vilanova concedió en 1276 un foru a un home d'Abres llamáu Rodrigo Alfonso de Viladonga pel que tenía que pagar «un bon salmón» tolos años nos meses que duraba la costera de la especie, dende Pascua de Resurreición hasta'l día de San Xuan.

Na zona baxa del ríu los derechos sobre la pesca del salmón tamién se repartíen ente delles families. Ensin embargu, los munchos discutinios ente elles a lo llargo de los sieglos XVI y XVII dieron llugar a destremaes particiones del «río de Abres», como tamién se denomaba al ríu Eo na documentación de la época. Nesti sen, la casa d'O Pibidal caltuvo permunchos pleitos colos vecinos de la zona pol repartu de los *días de bogo*, esto ye, los días que-y correspondíen pa pañar salmones con rede en pozos como'l d'O Fornacho o'l d'O Canaval, asitiaos nes cercaníes del llugar

d'Abres. Los alcuerdos que se roblaben duraben pocu tiempu y les amarraces repetíense davezu.

Regulábase, poro, la pesca del salmón con rede nos principales pozos del ríu. Anque les redes salmoneres podíen armase nel calce del ríu, polo regular redábase dende *barcas* o *chalanas* ente dellos pescadores. La *rede* yera, de xuru, l'arte de pesca más importante, pero non por eso yera la única téunica. Los ribereños emplegaben tamién otros instrumentos pa garrar de la forma más fácil los pexes. Asina, esviaben l'agua con *estacadas*, colocaben *nasas* nel calce y pinchaben a los pexes con *fisgas* o traentes pa sacalos del ríu, pero tamién envenenaben l'agua con distintos productos tóxicos, daqué que taba prohibíu dafechu.

LA PESCA NEL RÍU EO DENDE LA DESAPAICIÓN DE LOS PRIVILEXOS HASTA LA GUERRA CIVIL

La llexislación de les Cortes de Cádiz camudó dafechu la regulación de la pesca fluvial a principios del sieglu XIX y abrió una nueva etapa cola aprobación en 1811 del decretu conocíu como *llei d'abolición de los señoríos* pel que se desanicaben tolos privilexos señoriales, ente los que taba'l de la pesca, que de magar entós quedaba «al libre uso de los pueblos con arreglo al derecho común y les regles municipales establecidas en cada pueblo». Anque esta medida nun foi efeutiva hasta mediaos de sieglu, supunxo un cambéu perimportante na xestión de la pesca n'agües interiores, porque dexaba de tar en manes de la nobleza y el cleru y pasaba a ser regulada pola alministración pública del Estáu.

Énte'l nuevu marco llegal, y llueu de siglos d'esplotación esclusiva per parte de los señores, la xente de ribera nun duldó n'aprovechar de forma descomanada la riqueza pesquera del ríu Eo. Sicasí, les práutiques de los pescadores, que nun respetaben les épo-

ques de veda, atropaben les crías de les diferentes especies —sobre too de salmones— y emplegaban artes perdañibles y destructives coles poblaciones de pexes, dieron llugar a un amenorgamientu bultable d'estos recursos a lo llargo del sieglu XIX. Darréu d'ello, y por cuenta la desigual llexislación decimonónica, los conceyos de San Tiso d'Abres y A Veiga no duldaron en regular a lo cabero d'esta centuria la pesca na parte de ríu que pasaba pel so territoriu con ordenances municipales que, fundamentalmente, llendaben la temporada de pesca y les artes que nun podíen emplegase.

Les ordenances municipales de San Tiso d'Abres prohibíen pescar en cualesquier tiempu envenenando l'agua del ríu con cloruru, cal, coca o otres sustancias asemeyaes, tirando cargues de dinamita, cloratu o d'otra clas, lo mesmo que facelo con nases y redes que nun tuvieren una maya reglamentaria d'una pulgada cuadrada. Mesmamente, marcábase la veda del salmón del quince de xunetu al quince de febreru; la de la trucha del quince d'agostu al quince de febreru y la de la llamprea del quince de marzu al quince de xunu, por ser les épocas de procreación d'estes especies nesti ríu. Arriendes d'ello, el pescador con rede necesitaba la llicencia correspondiente para facer la so actividá, a lo que nun taba obligáu, pela cueta, el pescador con caña, aunque sí a respetar los meses de veda como'l restu. En dambos casos, les pieces pescaes fuera temporada requisábense y poníense multes a los que nun respetaben la norma. Pela parte de so, les ordenances municipales d'A Veiga, aunque con daqué menos procuru que les de San Tiso, prohibíen igualmente l'usu de redes y nases que nun tuvieren les mayes consentíes pola llei y pescar de mou xeneral de magar el primeru de marzu hasta'l trenta y un de xunetu nun siendo con caña o anzuelu, igual qu'en tou tiempu envenenando l'agua.

A principios del sieglu XX llegaron, de toles maneres, les primeres lleis integrales qu'intentaben iguar l'escosamientu de los ríos: les lleis de pesca fluvial de 1907 y de protección del salmón de 1912,

yá que tola llexislación anterior ocupábase de la cuestión namái que d'una forma parcial y secundaria. La llei de 1907 permitía la pesca con caña tol añu y reglamentaba l'usu de los destremaos tipos de redes, mentanto que la llei de 1912, que se llendaba únicamente al agua salobre del ríu baxo la xurisdicción de marina, restrinxía l'emplegu de cualesquier arte, incluyida la caña, a la temporada de pesca. La llei de 1907 permitía, asina mesmo, arrendar trechos de ríu a particulares o sociedaes pa la pesca deportiva col envís de fomentar la repoblación de los ríos y rentabilizar económicamente'l so caltenimientu. Depués d'ello, el decretu-llei de pesca fluvial de 1929, que refundió les dos lleis anteriores, llimitó l'usu de les redes a les agües salobres, prohibiéndoles nes dulces.

Anque yeren munchos los vecinos de los conceyos de San Tiso d'Abres y d'A Veiga que concasaben les xeres de llabranza y ganáu cola pesca, ésta dacuando y al furtivu, nel primer terciu del sieglu xx la práutica totalidá de pescadores profesionales del ríu Eo, alrededor de mediu cientu, vivía nel llugar d'Abres, nel conceyu d'A Veiga. La mayor parte de los vecinos del pueblu basaben la so economía nos ingresos llograos de la pesca nel ríu. La principal yera la del *salmón*, que se practicaba na baxera del ríu de mou reglamentáu baxo la vixilancia del *cabo de mar*, un celador del puertu de l'Ayudantía de Marina de Ribadeo, que dominaba alministrativamente'l ríu hasta onde llegaben les mareas, puntu que se concretaba na presa d'As Aceñas d'Abres. D'esta miente, nesta fasterina taba autorizada la pesca del salmón y otres especies con redes de maya y midíes reglamentaries. Agua arriba de la presa taba prohibío pescar salmón con rede, aunque facíase igualmente al furtivu. La regulación de la xera pesquera nos trechos del ríu baxo la xurisdicción de marina afitóse nel reglamentu del puertu de Ribadeo aprobáu en 1929.

Los pescadores de salmón con rede recibíen el nome de *bogadores* y hasta 1926 trabayaben en delles cuadriyes o *tandas* que riva-

lizaben por ser los primeros en *bogar* nos pozos, lo que daba lugar a una pergrán competencia que non siempre acababa de manera pacífica. Había n'Abres cinco grupos independentes dedicaos a la pesca del salmón: «Os de Refoxos», «Os da Ponte», «Os da Parzaría», «Os Macandros» y «Os da Palancana». Los bogadores embarcaban en chalanes que s'emburriaban con piértigos ferraos nel cabu y andaban dende la presa d'As Aceñas hasta la ponte d'O Fornacho. Diben paliando'l ríu intentando axuntar los salmones nos pozos pa llueu ellí *dar o bogo*, onde los aguardaba otra chalana cola rede llantada na banda. Bogaben n'A Poza, llueu nel pozu d'O Fornacho, baxo la ponte, y darréu diben bogando en tolos sitios posibles hasta llegar al pozu d'O Canaval. Pa esta faena, el mediu cientu de bogadores d'Abres mandábense con unes diez embarcaciones y alrededor de venticinco redes.

Pa la pesca del salmón, sicasí, los pescadores d'Abres non sólo usaban *redes de bogo* nos pozos, esto ye, redes barrederes o d'arrastre, que yeren les más corrientes y les úniques que permitía la llei, sinón tamién redes fixes, durmientes o de parada, prohibíes de toes toes, conocíes como *redes de meixón*, qu'armaban a mou de trinchera una tres d'otra na parte baxa del ríu y hasta na ría inclusive pa que los salmones cayeran nelles cuando xubíen el calce. Acordies col testimoniú del Marqués de Marzales, los ribereños

pescan con las redes fijas en toda su zona, de día y de noche, colocándolas a corta distancia unas de otras, de modo que son pocos los salmones que pueden sortearlas, excepto cuando el río está crecido. Con las redes de arrastre pescan en los pozos de la parte baja del río, y a veces han intentado subir aguas arriba, pero han sido perseguidos y denunciados por los guardas.³

³ Larios y Sánchez de Piña (1945: 221).

Les redes salmoneres qu'emplegaban los bogadores yeren rectangulares y de distintas dimensiones. La rede pa bogar nos pozos midía aproximao trenta metros de llargor y dos metros d'altor, tenía una maya toa igual de siete centímetros de llau y llevaba corchos na relinga cimera y pesos na baxera, mentanto que la rede que llantaben nel ríu cruzando'l calce hasta la metada yera daqué más curtia.

Nel añu 1926 intentó ponese fin a les munches y violentes amarraces que davezu había ente les distintes cuadriyes de bogadores d'Abres por cuenta la pesca'l salmón cola fundación d'una asociación cooperativa de pescadores y llabradores, que se denominó «Pósito Marítimo-Terrestre» d'Abres y que, como señalaba'l primer artículu del so reglamentu, buscaba

la completa redención, tanto de la clase pescadora como de la agrícola, extendiendo la cultura ente sus asociados, estableciendo a su favor los distintos seguros sociales, explotando sin intermediarios la pesca y productos agrícolas, procurando la construcción de toda obra que pueda favorecer el aumento del salmón y, por último, la conservación de todo aquello que redunde en beneficio de la parroquia.

El Pósito, que cuntaba col preste de l'Ayudantía de Marina de Ribadeo pa facer la so actividá, llevó a cabu un estimable llabor asistencial, acometió midíes pa la conservación de la fauna fluvial y llogró encalzar los discutinios ente los pescadores del pueblu. Pa la pesca del salmón organizáronse cuadriyes diaries col númeru d'homes precisos, afitándose veceres de manera que cada pescador sabía de mano cuándo-y tocaba bogar mentanto que la pesca de les demás especies del ríu quedaba a llibre disposición de caún.

Nesti sen, pa la pesca de la *truita* y el *reo* los pescadores d'Abres usaben nos meses del branu'l *borxel a vara*. Yera un tresmayu compuestu por tres redes paraleles auníes pelos bordes, dos de maya grande y de les mesmes midíes y una de maya mui pequeña y más

grande que les otres que diba en medio. Llevaba na relinga baxera unos pesos y nel borde cimero unos argolles peles que se metía una varangolla llarga que se remanaba dende la oriella. La rede diba arrastrándose corriente abaxo pel agua y alábase cuando se pescaba dalguna trucha.

Pero los paisanos nun emplegaban sólo redes pa sacar los peces del ríu. Tamién se valíen nos meses d'iviernu de pervariaos tipos de nases o butrones onde los pexes quedaben presos ensin poder salir, como la *masoira* pa los salmones y la *limaqueira* pa les truches. Esta cabera yera una nasa de rede más pequeña que la primera, armada con tres arcos de madera y dos forquetes que s'afondaba con un cebu de *limacos*. Estos aparexos asitiábense na presa d'As Aceñas o ente les sebes pela nueche y, como toles artes fixes, taben prohibíos pola llei. Usaben tamién la *fisga* o *trayente*, un preséu a mou d'arpón con siete dientes col que pinchaben al *peixe*. Aunque se podía emplegar dende tierra pa garrar un salmón o una trucha en cualquier momentu, yera corriente que la pesca de salmones con fisga se fixere pela nueche y nuna barca tripulada por tres persones: una remaba, otra llevaba una llámpara pa llamar a los pexes y la tercera manexaba la fisga. La *llamprea*, pela so parte, pescábase por un regular con un *fisgo* de tres dientes. Xunto a toes estes artes, los pescadores tamién echaron mano de sustancias tóxicas o venenosas como yera'l casu del cloruru, la llexía o'l muergu de nuez machacao, que la llei prohibía dafechu, lo mesmo que la dinamita.

Pa pescar *angula* los ribereños emplegaban, ensin embargu, otres erbíes distintes. Estos pexes garrábense namás na fastera baxa del ríu, enantes de la formación de la ría, ente la ponte d'O Fornacho d'Abres y la villa d'A Veiga. La pesca del ríu angula facíase sólo pel iviernu, de nueche y con marea alta. Facía falta pa ello un *esquileiro* (peñera), compuestu por un aru grande de maya metálico mui fino suxetu a un palu lo más llargu posible, asina

como una lluz y un caxón. La lluz llamaba a les angules contra'l pescador, que colaba l'agua col esquileiro y posaba la pesca nel caxón. L'*anguila*, pela so parte, pescábase polo xeneral cola *tramuella*, que consistía n'enfilar *miocas* (merucos) nun filu gordu de más d'un metru de llargo que se suxetaba a un cordel de dos o tres metros de llargo que s'amarraba nel cabu d'una vara. Afondábense los merucos y namás que picaben los pexes sacábense rápido del agua y posábense nun caxón. Tamién s'emplegaban unes tixerres o tiñaces especiales col filu en sierra que suxetaben al peixe pa sacalu a tierra.

D'otra banda, y al empar que l'actividá pesquera profesional de los bogadores d'Abres, nel primer terciu del sieglu xx entamó la pesca con fines recreativos cuando l'aristócrata gaditanu Pablo Larios y Sánchez de Piña, marqués de Marzales, llogró la concesión per parte de l'alministración d'un arriendu de pesca nel ríu. Tratábase d'un trechu de cuatro kilómetros y mediu de llargo ente'l pozu de Saltadoiro, onde taba asitiada la presa de Pe da Viña, y el pozu d'A Negra, que corría a lo llargo del conceyu de San Tiso d'Abres. La concesión, que tenía como oxetu'l disfrute y derechu esclusivos de pesca de salmón y trucha per ocho años, principió en 1917 y acabó en 1925. Esti cotu foi pioneru na pesca deportiva n'Asturies y un modelu de los que se crearíen llueu. L'únicu preséu autorizáu pa pescar nel trechu cotáu de ríu yera la *caña*, prohibiéndose cualesquier otru métodu pa sacar los pexes del agua. El cotu, amás, tenía un guarda xuráu que pagaba'l propiu arrendador, lo qu'enzancaba enforma la pesca furtiva que se facía nesa parte del ríu.

El Marqués de Marzales yera acérrime de la pesca con caña y, de fechu, fueron él y los sos acompañantes los que dieron puxu al so emplegu nel ríu Eo convirtiéndose, arriendes d'ello, nos primeros *sportmen* que vinieron a la zona a prauticar la pesca con unos fines namái deportivos y de fuelgu. Igualmente yera un estudiosu

de la bioloxía del salmón y de les condiciones más acondaes pa la reproducción y desarrollu de la especie, recoyendo los sos conocimientos sobre los ríos asturianos nun trabayu —con permunches anotaciones sobre L'Eo— que foi premiáu pola Diputación Provincial d'Uviéu en 1927. Nesti sen, el Marqués de Marzales nun se dedicó namás a pescar nel trechu arrendáu, tamién s'ocupó de desenvolver les midíes que-y abultaben necesaries pa recuperar la riqueza pesquera del ríu, echando a andar la primer piscifactoría del ríu Eo, que dio como resultáu la medría de la producción salmonera del mesmu. La so presencia na fastera influyó, de xuru, na fundación en 1926 de la «Sociedad de Pesca Astur-Galaica» de San Tiso d'Abres per parte d'aficionaos del conceyu a la pesca deportiva.

El cotu del Marqués de Marzales tuvo darréu la so continuidá nel arriendu de pesca que concedieron al madrilanu Enrique Fernández de Villavicencio y Crooke, cuñáu del marqués, na mesma zona del ríu, aunque nesti casu tratábase de dos tramos separaos, ún de tres kilómetros ente los pozos de Saltadoiro y A Volta y otru de doscientos venti metros na redolada de la ponte de San Tiso. L'arriendu, que duraba tamién ocho años, entamó en 1931 y tenía qu'acabar en 1939, pero foi perdiendo puxu adulces, sobre too depués d'estallar la guerra civil. Esti cotu tenía dos guardes xuraos, pagáu ún d'ellos pol propiu arrendador.

A los paisanos nun-yos prestaron munchu estes concesiones nel ríu a particulares, porque la presencia de la guardería nes partes cotaes suponía una torga a la hora de pescar llibremente na zona, aunque non por ello dexaron de facelo al furtivu. La pesca recreativa, considerada como una actividá deportiva y de fuelgu, ensin un interés económicu, abríase pasu nel ríu Eo. El Marqués de Marzales y los sos acompañantes fueron pioneros nesti ríu nel emplegu de la caña pero tamién, de xuru, na práutica de la pesca con fines exclusivamente deportivos.

LA PESCA NEL RÍU EO TRES LA GUERRA CIVIL.
EL DESARROLLU DE LA PESCA RECREATIVA

Depués de la guerra civil prohibiéronse toles artes emplegaes na pesca de ríu a nun ser la caña con anzuelu. Énte'l peligru d'una desapaición completa del salmón darréu de la práutica de la pesca al marxe de los preceutos llegalos, en 1939 prohibióse l'usu de cualesquier clas de rede na pesca de los ríos del norte de la península hispánica. Esta disposición, como ye aguardable, nun foi nada bien acoyida ente los ribereños del ríu Eo, sobre manera ente los pescadores d'Abres, que veníen prauticando d'antiguo la pesca del salmón con rede d'una manera reglamentada. Entós dellos vecinos del llugar, pertenecientes al Pósito Marítimo-Terrestre, unviaron una instancia al gobernador civil asturianu suplicando que quedara ensin efeutu y se-yos concediera l'autorización pa seguir pescando salmones con rede na fastera baxa del ríu, pero la so petición foi denegada. De fechu, la prohibición al emplegu de redes caltúvose na nueva llei de pesca fluvial de 1942, que namás permitía pescar exemplares emplegando la caña con anzuelu.

El furtivismu disparóse entós ente los vecinos d'Abres qu'aprovechaben la escuridá de la nueche para pescar con toa mena d'artes ilegales y hasta inclusive en tiempu de veda. Nesti sen, el periódicu *La Nueva España* facíase ecu de les práutiques de los pescadores furtivos y recriminábalos duramente nes sos páxines. Pa la pesca del salmón los ribereños siguieron emplegando dellos tipos de redes, yá fueren fixes o durmientes na fastera averada a la ría (*redes de meixón*), yá barrederes o d'arrastre nos pozos del ríu (*redes de bogu*), prohibíes toes elles, pero tamién otros presees como *masoiras* y *figas* que yeren, xunto a les redes, les artes más arramaes históricamente ente ellos; mentanto que pa la pesca de la trucha y el reu siguieron usando redes específiques como'l *borxel a vara* y *limaqueiras* qu'asitiaben nes zones acionaes pa ello.

Col tiempu, sicasí, foi espardiéndose adúlces l'usu de la caña, l'únicu preséu permitíu pola llei, que traxeren al ríu Eo les persones que pescaben nos cotos anteriores a la guerra. Diéronse clases de pesca con caña y concediéronse subvenciones pa mercar equipos a los vecinos d'Abres col envís d'arramar la nueva téunica, pero'l so éxitu foi de mano enforma escasu. Los pescadores namái podíen emplegar la caña pero intentaben engañar a les autoridaes pa sacar del ríu la mayor cantidá posible de salmónes. Diben al ríu cola caña, pero tamién con otros aparexos escondíos qu'emplegaban pa sacar los pexes y intentar pasá-ylos a la guardería como pescaos con caña. De toes maneres, pasu ente pasu, al empar qu'ameyoraba la vixilancia del ríu, foi aumentando l'usu d'esti instrumentu ente la xente y amenorgando l'emplegu de les demás artes de pesca. Adúlces, los vecinos d'Abres foron dexando esta forma de ganase la vida y emigrando del pueblu al ser conscientes de que'l so oficiu yá nun tenía futuru y que la pesca taba convirtiéndose nuna actividá deportiva y de fuelgu. Contra la década de los setenta yeren yá pocos los vecinos que pescaben como una actividá productiva d'una manera profesional.

D'otra parte, la llei de 1942 contemplaba la concesión d'arriendos de pesca n'agües públiques pal afitamientu de cotos fluviales con fines exclusivamente deportivos. A la Direición Xeneral de Turismu concedióse-y en 1945 un cotu de pesca nel ríu Eo, ente la presa de Pe da Viña y la ponte de San Tiso, que venía, en daqué midida, a dar continuidá a los cotos particulares d'enantes de la guerra, porque trescurría prácticamente pel mesmu trechu de ríu qu'aquellos a lo llargo de San Tiso d'Abres. Esti cotu contribuyó enforma pal fomentu de la pesca deportiva del salmón nel ríu Eo, al empar que llamó a munchos turistes españoles y estranxeros a la comarca. Precisamente, la propia Direición Xeneral de Turismu consideraba al ríu Eo como un extraordinariu ríu salmoneru que, desque se llograra evitar la

pesca con redes que facíen los vecinos d'Abres, daría una producción de salmones abluicante.

La creación d'esti cotu entamó, amás, una espaciosa organización del ríu por parte de l'alministración. En 1956 creáronse otros dos cotos, dependientes nesti casu del Serviciu Nacional de Pesca Fluvial y Caza, col envís de da-y puxu a la pesca fluvial deportiva: los cotos d'A Pontenova —na zona alta— y d'Abres —na baxa—, ente los que quedaba'l cotu de San Tiso. Aunque los sos fines yeren asemeyaos, esti caberu yera más elitista que los dos primeros, variando tamién la so regulación al corresponder la xestión a organismos independientes. Caún d'estos cotos estayóse más alantre en distintes partes o lotes que se repartíen ente los pescadores al principiu de la temporada de pesca. Pa prauticar l'actividá nellos facía falta, amás de la llicencia de pesca, tener el permisu correspondiente. A muncha xente nun-yos prestó'l cotu de San Tiso, porque a diferencia de los d'A Pontenova y Abres, non sólo los permisos p'acceder a él yeren más caros, sinón qu'amás los exemplares pescaos nun podíen vendese y, poro, nun podía sacáse-yos beneficiu económicu nengún. En 1971 el Serviciu Nacional de Pesca Fluvial y Caza dio pasu al Institutu pa la Conservación de la Naturaleza (ICONA), muérganu autónomu que dependía del Ministeriu d'Agricultura, que se fixo cargu de los cotos d'Abres y A Pontenova y en 1981 del de San Tiso, pasando toos ellos per primer vez a xestionase d'una manera unitaria pol mesmu ente públicu.

La creación de los cotos de pesca significó, d'otru llau, una meyora bultable na vixilancia del ríu, al que se-y dio una guardería que llegó a tar compuesta por siete guardes, tres nel cotu de San Tiso y los demás repartíos ente los d'A Pontenova y Abres. La guardería tenía como principal oxetivu, poro, vixilar y poner frenu a les práutiques furtives de los ribereños, sobre too d'Abres, lo que llevaba munchos roces al ser toos ellos vecinos. Pero los guardes tamién facíen otros llabores non menos importantes, porque

s'encargaben de les repoblaciones periódiques que se facíen nel ríu, asina como del precintu de los salmomes, que consistía nel esame de los exemplares pa certificar que se pescaren llegalmente rellenándose en cuyu casu una ficha o guía onde s'anotaben les carauterístiques del pexe y precintando la cola del exemplar pescáu, lo que lu permitía circular ensin que lu requisaren.

El cotu que xestionaba la Direición Xeneral de Turismu significó, amás, un grandísimu impulsu económicu pa la fastera, especialmente pa San Tiso d'Abres, a onde vinieron a pescar munches personalidaes tanto españoles como estranxeres, ente les que se topaba'l propiu xefe del Estáu, Francisco Franco, casáu cola carbayona Carmen Polo y gran aficionáu a la pesca, y al que-y picaben los salmomes con muncha más facilidá qu'a los demás pescadores, porque dellos díes enantes de la so llegada la guardería fluvial vedaba dalgunos tramos del ríu pa que s'amontonasen ellí tolos peces posibles y él pudiere asina pescalos más fácil.

La pesca deportiva nestos cotos per parte de turistes dio llugar a l'apaición d'un particular oficiu ente la xente de la zona. Los *gancheiros* yeren ribereños qu'acompañaben a los pescadores foranos y guiábenlos pel ríu. Foi'l propiu guarda mayor del cotu de San Tiso'l que promovió y fomentó esta actividá ente los vecinos del conceyu, llamando a munchos rapazos pa qu'acompañaren a estos pescadores y ganaren dalguna perra. Munchos d'ellos anduvieren primero al furtivu y conocíen el ríu a la perfeición. Nun primer momentu la compañía de los pescadores deportivos que veníen de fuera valió-yos a estos mozos pa deprender a usar bien la caña, pero más tarde foron ellos los qu'empezaron a aconsejar cómo pescar a otros pescadores menos avezaos, adquiriendo una gran nombradía nel ámbitu ribereñu y ente los propios pescadores. Ayudaben en tolo rellacionao col lance y ente los sos llabores taben la escoyeta de los meyores sitios pa pescar los salmomes y de les artes más aparentes, pero tamién la preparación de los cebos. Ellos yeren,

amás, los encargaos de *ganchear*, ye a dicise, enganchar el salmón col ganchu que llevaben siempre con ellos pa echalu en tierra llueu que'l pescador lu tenía a puntu.

En cuantes llegó la democracia cola aprobación de la Constitución, la xestión de la pesca nel Eo quedó repartida ente les dos comunidaes autónomes que comparten les sos agües. Asina, dende 1985, añu cuando se fixeron efeutives les competencies autonómiques nesta materia, el gobiernu asturianu pasó a encargase de la xestión de los trechos propios y a compartir al cincuenta por cien col gobiernu gallegu la xestión de los tramos cabeceros.

En fin, a lo llargo del sieglu xx, aunque más en particular tres la guerra civil, la pesca fluvial nel ríu Eo dexó pasu ente pasu de ser exercida polos vecinos d'Abres y otros pueblos ribereños con una finalidá económica y de manera profesional pa convertise nuna actividá exclusivamente recreativa, de calter deportivo y de fuelgu, practificada por tol mundu.

FONTES ORALES

José María «Lóutima» Martínez Rodríguez, natural de Lóutima (Taramundi) y vecín de San Tiso d'Abres. Guarda mayor de L'Eo.

Álvaro Oliveros Soto, natural y vecín d'Abres (A Veiga). Guarda de L'Eo.

Eloy Cigarrán Rodil, natural y vecín de Salcido (San Tiso d'Abres). *Gancheiro* de L'Eo.

Gervasio Novo Paraje, natural y vecín de San Tiso d'Abres. *Gancheiro* de L'Eo.

José Ramón Yanes Díaz, natural y vecín de San Tiso d'Abres. *Gancheiro* de L'Eo.

Cándido Sanjurjo Fernández, natural y vecín d'Abres (A Veiga). Pescador de L'Eo.

FONTES IMPRESOS Y MANUSCRITOS

- Ordenanzas municipales de Vega de Ribadeo*. Lluarca, Imprenta de Ramiro P. del Río [1894].
- Ordenanzas municipales del concejo de San Tirso de Abres*, exemplar manuscrito del Archivu Municipal [1894].
- Reglamento de la Sociedad de Pesca Astur-Galaica de San Tirso de Abres*. A Coruña, Imprenta Zincke Hermanos [1926].
- Reglamento del Pósito Marítimo-Terrestre de Abres-Vegadeo (Asturias)*. Ribadeo, Tipografía de «Las Riberas del Eo» [1927].
- Reglamento de Policía y Tráfico del Puerto de Ribadeo y reglas que se han de tener en cuenta a fin de evitar la despoblación de la pesca en la ría*. Ribadeo, Tipografía de «Las Riberas del Eo» [1929].

BIBLIOGRAFÍA BÁSICA

- BAS COSTALES, Xuan F. (2007): *La pesca en el Eo. Cultura y tradición ribereña*. Ayuntamiento de San Tiso d'Abres.
- CANCIO MENÉNDEZ DE LUARCA, Saturnino (1930): «El río Eo y su pesca de salmón», en *Boletín de pesca y caza* 3: 1-6.
- CARVALLO, Padre Luis Alfonso de (1695): *Antigüedades y cosas memorables del Principado de Asturias*. Madrid, Imprenta de Julián de Paredes.
- CASAL, Gaspar (1988): *Historia Natural y Médica del Principado de Asturias*. Uviéu, Serviciu de Publicaciones del Principáu d'Asturies.
- FERNÁNDEZ VIOR, José Antonio (1997): *Notas etnolingüísticas del concejo da Veiga*. A Caridá (Asturias), Xeira.
- JUSÚ MENDICOUAGUE, Pedro de (1953): *Las regalías salmoneras. Noticia histórica sobre la pesca del salmón en Cantabria*. Santander, Centro de Estudios Montañeses.

- LARIOS Y SÁNCHEZ DE PIÑA, Pablo (marqués de Marzales) *et alii* (1945): *El salmón y su pesca en España*. Madrid, Dirección General de Turismo.
- NAVA Y CAVEDA, Hilario (1878): «Consideraciones sobre la pesca del salmón en España, y legislación especial que debe regir dicha pesca», en *Anales de la Sociedad Española de Historia Natural*. Madrid: 285-342.
- OCAMPO SUÁREZ-VALDÉS, Joaquín y Silvia SIERRA GONZÁLEZ (2006): «La pesca fluvial», en Javier RODRÍGUEZ MUÑOZ (dir.), *Asturias y la mar*. Uviéu, Editorial Prensa Asturiana: 203-220.
- PARDO, Luis (1934): *Cuestiones de pesca fluvial*. Valencia, Imprenta Hijo de F. Vives Mora.
- RODRÍGUEZ MUÑOZ, Javier (2005): «La pesca en los ríos», en Javier RODRÍGUEZ MUÑOZ (dir.), *Los asturianos. Raíces culturales y sociales de una identidad*. Uviéu, Editorial Prensa Asturiana: 311-328.
- RODRÍGUEZ SANTAMARÍA, Benigno (1911): *Diccionario ilustrado, descriptivo, valorado, numérico y estadístico de los artes, aparejos e instrumentos que se usan para la pesca en las costas del Norte y Noroeste de España*. Madrid, Artes Gráficas «Mateu».
- (1923): *Diccionario de artes de pesca de España y sus posesiones*. Madrid, Suc. de Rivadeneyra.
- SANJURJO FERNÁNDEZ, Cándido (1996): *Entre Fonteo y el mar. Apuntes sobre el Eo y su entorno*. Uviéu, Serviciu de Publicaciones del Principáu d'Asturies.
- (s/f): «La pesca en Abres. Los bogadores del Eo», testu manuscritu ufiertáu pol autor, 7 pxs.
- SÁÑEZ REGUART, Antonio (1791-1795): *Diccionario histórico de los artes de la pesca nacional*. 5 tomos. Madrid, Imprenta de la Viuda de Don Joaquín Ibarra.